

Newspaper	BERITA HARIAN
Date	08 DECEMBER 2016

Najib minta DBKL bangunkan semula medan selera Dataran Sri Angkasa

→ Perlu segera berbincang dengan persatuan peniaga bagi sedia pelan pembangunan

► Kuala Lumpur

Tinjauan mengejut Datuk Seri Najib Razak membawa khabar gembira kepada peniaga Medan Selera Dataran Sri Angkasa Jaya, Lembah Pantai di sini apabila beliau meminta Dewan Bandaraya Kuala Lumpur (DBKL) membangunkan semula medan selera itu.

Perdana Menteri berkata DBKL perlu berbincang dengan persatuan peniaga secepat mungkin bagi menyediakan pelan pembangunan semula kawasan perniagaan itu.

“Alhamdulillah, saya dapat buat tinjauan dan melihat sendiri medan selera ini sambil mendengar keluhan peniaga di sini. Memang mereka ada asas kenapa perniagaan mereka tertekan selama ini.

“Peniaga di sini boleh memperoleh pendapatan jauh lebih tinggi pada masa akan datang apabila kita bangunkan semula medan ini dengan pelbagai ciri yang sesuai seperti tempat letak kereta bertingkat,” katanya kepada media semalam.

Santai bersama penduduk

Najib yang tiba kira-kira jam 5.30 petang, disambut Ketua UMNO Bahagian Lembah Pantai, Datuk Seri Raja Nong Chik Raja Zainal Abidin yang kemudian mengiringi beliau untuk sesi santai bersama penduduk dan peniaga.

Najib yang juga Menteri Kewangan turut bertanya khabar, bersalaman dan bergambar dengan komuniti itu sebelum beredar setengah jam kemudian.

Fakta
nombor

20 KEDAI

daripada 88 premis yang beroperasi berikutan masalah parkir dan akses laluan keluar masuk

Sementara itu, Pengerusi Persatuan Penjaja Cawangan Bangsar, Abu Seman Alias, berkata pelan pembangunan itu sememangnya ditunggu-tunggu peniaga bagi meningkatkan pendapatan mereka, selain menyelesaikan masalah parkir di kawasan itu.

“Kami percaya pelan ini akan meningkatkan pendapatan masyarakat penjaja dan memberi peluang untuk mendapatkan kemudahan yang lebih baik dan selesa untuk berniaga dan bersantai. Masyarakat setempat juga pasti akan memanfaatkannya,” katanya.

Medan selera itu dibuka sejak 2008 dan menempatkan 88 kedai namun hanya 20 kedai yang beroperasi berikutan masalah parkir dan akses laluan keluar masuk ke kawasan itu.

BERNAMA

BH- 8/12/2016